


<https://news.usm.my>

Berita Mutakhir ▼

29 MAR

JABATAN DI USM DIMINTA PERGIAT USAHA BANTU OKU



BERTAM, 26 Mac 2015 - Pusat-pusat Tanggungjawab (PTJ) Universiti Sains Malaysia (USM) diminta mempergiat program membantu Orang Kelainan Upaya (OKU) untuk mereka menyesuaikan diri dalam arus perkembangan Sains dan Teknologi (S&T) masa kini.



Timbalan Naib Canselor Jaringan Industri dan Masyarakat (BJIM), USM Profesor Dato' Dr. See Ching Mey, berkata, sebagai sebuah institusi yang memperjuangkan isu kelestarian, kemanusiaan dan masa hadapan manusia, semua pihak perlu bersama-sama berganding bahu dalam membantu OKU daripada tersisih dalam perkembangan S&T.



"BJIM USM akan sedaya upaya membantu dan menyokong setiap aktiviti melibatkan pelbagai kumpulan masyarakat terutamanya golongan OKU yang sentiasa mendapat perhatian khusus kita", katanya ketika berucap merasmikan Program Celik Herba Pelajar Keperluan Istimewa anjuran Kluster Perubatan Integratif, Institut Perubatan dan Pergigian Termaju (IPPT) dengan kerjasama BJIM USM.

Menerusi program ini, seramai 20 orang pelajar OKU pendengaran dari Sekolah Menengah Pendidikan Khas Persekutuan Pulau Pinang telah dibawa ke IPPT untuk memahami dan mempelajari bidang perubatan herba yang kini semakin popular dalam kalangan masyarakat.



Antara aktiviti yang dijalankan sepanjang program ini ialah sesi interaksi yang meliputi kuliah, aktiviti lapangan dan eksperimen di makmal bagi mendedahkan pelajar ini tentang kebaikan dan keburukan herba.



Selain itu, pelajar juga didedahkan dengan kaedah penyelidikan saintifik dalam perubatan herba, cara-cara menyediakan herbarium untuk herba dan membuat rujukan herba berdasarkan taman herba yang ada di IPPT.

Ketua Kluster Perubatan Integratif, Dr. Lim Vuanghao pula berkata pihaknya kini sedang berusaha mewujudkan sebuah taman herba untuk menjadi pusat rujukan perubatan herba kepada semua golongan masyarakat.

"Dengan adanya taman herba ini, maka inisiatif untuk pembangunan modal insan dapat dilaksanakan untuk golongan pelajar OKU ini," katanya lagi.



Pihaknya juga berharap agar langkah ini dapat membuka minda setiap golongan pelajar bermasalah pendengaran ini dan membantu dalam melestarikan usaha memindahkan ilmu kepada rakan-rakan senasib dengan cara mereka tersendiri, sekaligus mencetus bakat-bakat baru dalam bidang kajian herba.
- Teks: Faisal Jamaludin, IPPT



Share This

Pusat Media dan Perhubungan Awam / Media and Public Relations Centre

Level 1, Building E42, Chancellory II, Universiti Sains Malaysia, 11800 USM, Pulau Pinang Malaysia

Tel : +604-653 3888 | Fax : +604-658 9666 | Email : pro@usm.my (<mailto:pro@usm.my>)

Laman Web Rasmi / Official Website : [Universiti Sains Malaysia \(http://www.usm.my\)](http://www.usm.my)

[Client Feedback / Comments \(http://web.usm.my/smbp/maklumbalas.asp\)](http://web.usm.my/smbp/maklumbalas.asp) | USM News Portal. Hakcipta Terpelihara USM 2015